

四庫全書薈要·乾隆御覽本

集部

欽定四庫全書薈要

集部

御定歷代賦彙卷二十一

詳校官候補通政司經歷臣郭祚熾



御定歷代賦彙卷二十

地理

羅浮山賦 有序

宋謝靈運

浮山事云茅山是洞庭口南通羅浮正與夢中意相會  
遂感而作羅浮山賦曰

若廼茅公之說神化是悉數非億度道單悒悒洞四有

羅浮山賦

客夜夢見延陵茅山在京之東南明旦得洞經所載羅

九此惟其七潛夜引輝幽境朗日故曰朱明之陽宮耀  
真之陰室洞穴之竇衢海靈之雲術伊離情之易結諒  
沉念之羅浮發潛夢於永夜若湖波而棄桴越扶嶼之  
細漲上增龍之合流鼓蘭柁以水宿杖桂策以山遊

羅浮山賦

宋 李南仲

羅浮二山東西相聯通句曲之洞號朱明之天連延大  
江之外崛起滄溟之壖乃百粵羣山之祖與南嶽而齊  
肩鐵橋鎖乎絕頂石樓峙乎半巔登覽遐極眇睇芊緜



爾其周迴五百七十二里森列四百三十三峰迴谿峻  
谷截嶠崆峒藻石璀璨瀑水玲瓏山出玳瑁竹茂龍蔥  
羣雀五色靈藥千叢寂寞兮丹砂遺電岌業兮瑤臺隱  
空懸厓斗折徑路難通祥雲瑞霧晝夕朦朧時有岸幘  
羽服野人山翁忽去倏來不知其蹤謂長生而久視亦  
往往寓乎其中時有萬舶乘風不知西東瞻我峻極煙  
光蒙茸洞谷昏黑開乾闥坤怒風叫號轟騰四門徐而  
內隱隱若萬兵之屯呼吸號召鬼神湊奔徐而萬籟息

朝霞暎日月晃耀氣象始溫又或五夜蕭森樂池奏音  
彷彿仙籟彈絲擊金疑有雲和之瑟空桑之琴青谷闕  
邃列仙下臨聚會靈族朋來盍簪列席環坐開廓沖襟  
踈楹廣庭寶除翠林海桃霞漿左右酬斟樂真言之恬  
澹憫世網之浮沉倏然往來不繼以淫瞬息萬里散飈  
馭之駸駸變化倏忽孰能究尋其上則有惟金三品瓊  
杓杞梓翡翠羽毛虎豹犀兕竹箭丹砂締繡絲象珍角  
糝桶元龜象齒石蜜山焦黃精白芷蛾眉龍骨桂香桐

子先供賞以充庭何九州之敢擬真足以燦上國之文章增皇家之盛美矧夫當祝融之宅位贊真主以乘離雲行雨施產英孕奇其在國家有大禱祈驛使奔走帝誠肅祇投金龍與玉版指道路以交馳將事之夕明靈鑒斯乃至翔鸞舞鶴繞殿紫芝仙壇祭訖宣室受釐萬有景福允王保之帝子王孫慶流本支獻南山之壽歌天保之詩與夫他山奠璧徒當乎四達之達聖飾別館止可事乎遊嬉於功業兮何補於造化兮何裨豈比增

高福地薦美天基鞏固四極鎮安外夷巍巍隆隆無騫  
無虧宸臺秘軸文采歲蕤瑞牒顯著又奚論乎真區之  
遠而

遊羅浮山賦 有序

明 湯顯祖

夫星圖粵地引潮汐於玄紐日次周天晷晝夜於陽陸  
然則南嶺之南北戶之北固已輿象之所偏龐燭龍之  
所長寤矣而廬嶽天子之障衡山祝融之標樞軸雖連  
於西極經絡未窮於南紀高融與博是在羅浮羅山上

直百粵之精旁羅赤溟之氣軒轅以降隆爲粵嶽矣而  
浮山者是惟蓬萊神仙浮自會稽靈海斷鼇不足比其  
波蕩操蛇不足異其轉徙蓋流睽絕嶠佇眙分畧飛峰  
息壤神理自然所悵鬱者名迹蕪藹采真莫續湧塔暗  
朝花之影沉湖銷夜樂之音每與友人禱衍曾曾人藉  
歎恨其竒大有終焉之意而束官陵祀升踐靡由辛卯  
冬十月始以出尉徐聞速令尹崔子玉於南海遲文學  
翟從先於東莞拙川墟履原隰宿朱明曜真之館候晴

霏焉蓋晦夕也詰朝朔微雨襲梅墟經石門聽泉於葉  
大夫春及之廊阿明日觀大簾泉避雨朔肫弔湛公於  
黃龍講堂道甚窄硤夜火青霞洞中有湛公樓七楹仙  
鼠居之此盡下界三矣明日起青霞至巔際觀日出爲  
中上六界美人峰殊好袖如道人時時出雲其下千仞  
葉大夫石館處也日始華露欲晞見城郭者四五前立  
石雙如蛾翅豎又立石翦爲燕子門一名彈子門爲美  
人障其前蟾蜍峰也同人不前獨往彌勝從數羽衣人

芟蘊而上鳥道三十餘里迴翔眩視草樹飛走光氣有  
異非所經識意謂靈境阻鬱割然一岡平曼修婉名以  
子午正其昏朝登頓再舍圭陰未禺遂躡飛雲凌日觀  
惟見香爐一具白水一卮祀羅浮君焉望天池以陽星  
沙而陰東連扶津之藹西盡崦嵫之色靡不區封有吟  
昭藐無倪者矣可謂恢魁乎大觀淵豁其神致也哉枕  
石起卧欣言賦之擬於謝靈運想似浮寫差爲飛愜云

爾

極廬衡之經首暉赤嶽於賁禺略招搖之桂樹望雲氣  
於蒼梧問津塗於莞城釋汎舟於源墟豔林霏之窈窕  
漠巖戶之紆徐晨光飛而首路夕影流而載驅倒煙容  
於襟帶睇朱明於隙餘磴環賴於莽蒼林織密以扶疎  
策孤征而晻影鳥羣歸而沸呼傍靈池以涉趾歷迴梁  
而聳軀鐘鼓鳴於林間香氣騰於路隅是爲帝軒轅之  
所履神赤燁之所廬坐參正而披衣閱柳中而定居何  
遷人之鞅掌得借一於沖虛靈想接而心歡營宅清而



寐除慨衣冠其委土想丹竈之流珠問洗藥於真人發  
靈簫於聖姑守瑤光之玉虎戴碧斗之銅魚恨天華之  
宮不存怨明月之壇久蕪斷冥心其莫引翳神光其忽  
諸徒使來粵都者走明珠於合浦浮毳衣於賈胡彼阜  
壤與山林非天性其焉知將縱觀其窟宅恣風雲之襲  
余度石闕之穹窿接新構之離婁泉淙淙而夜鳴雲英  
英而晝敷清不可分久留澹容與以踟躕山帶氤而翠  
積水簾波而素紆營磐砥兮偃仰蹙葩華兮噴噓避雨

蝴蝶之洞睨梁天漢之墟拂金沙兮夜語蹶青霞兮旦  
發逗威夷而宛轉望敦龐而塊軋澹孤青於氣表漏陽  
華於空閱春崖隙於川渠錯璵璣於樓閣雖道絕於登  
降亦臨觀其曲折緬層城其在茲遞仙風而岌嶸俯龍  
門而直上有流光之影撇激上界之精華照下方之明  
滅何峰容之偉奇漾真人之秀烈偶儷石之前臨露參  
差而障列如倚翅以斯沖似懸帆之次揭映神姬之出  
雲美朝暎而暮晰轉靈蝸而下視象寒津之漱齧始神

山其浮來自會稽而涌堦覽至今其草木有東方之種  
別泯合際於羅丘度鐵橋而緞缺豈華靈之遠擘非秦  
皇之近設抵半舍而泉分宿煙炊而飯潔頓金策之拳  
奇步羽人之勃窣上登蔀其若梯進孱顏其若關峭壁  
虛而溜浮積泐歛而苔滑寄掌股於旁陘託跟趾乎冒  
概蓋起瑤池而躡飛雲周三十里之靈樾象耕之所絕  
蹊堆樵之所迷術肆奇樹之蔥蘢并異卉兮冥密紺蒼  
凝而互陰碧鮮流而競發固風霞之所藹蔚亦丹青之

所淫鬱有一花而四照有五色而一節或建日而無影  
或嵌空而有雪青珠冷風其欲亂珊瑚叢生而逾活神  
麤倚其雍容仙髯影而撇拂木客離筵而似語山魃隱  
映而倏忽別有朝菌若雲夜芝如月翠羽攢菁金粉浮  
馥曩得一而爲豔此成林而不掇固靈境其常然歎人  
生之觀絕謂林封而徑窮忽岡巒之秀闊儼撐距而不  
前乃業衍而條達曉發足於青霞午凌岡而載茂候雞  
鳴於上霄降茲巒而于末正子午之嘉名定昏曉之相

割念人間之急畧方旋車而已瞥矧山行之阻迂慮峰  
攢而影咽竟凌霄而未禺何鄧林之蚤渴豈日氣之偏  
延非海音之所過遂徑庭其造天極空窠而戴日屬湘  
嶷於壘碓辨交簾之隴埒眇菁木於河林認扶桑於渤  
碣挾瓊州而地矯引長星而天豁布肝蠻之茫茫衆每  
生而忽忽偶旦宅以推排糝山川與名物昔冥丘而去  
燕今南池而徙越爲情多其苦悲亦心淺而易悅塵影  
含而智虧年路深而意沒夜樂何時而遇仙花首何因

而禮佛忖凡情於聖真若闕觀於窮髮將無始之趣未  
融令有終之相難閱朱鳳沫而潭氛碧雞殷而石裂覽  
異鳥其參差意靈禽之彷彿宮觀歸而如在丘壑虛而  
豈屈吾將洗浮盪於自然悟空明於一切朱陵之洞可  
遊曜真之氣長結灼光景兮莫不知乎天之所窮靚凌  
競兮吾以觀乎日之所出

遊羅浮山賦

明 王漸達

丁亥歲十月王子自青蘿而東迄於扶胥遡增江之環

流望羅浮之故墟感神明之奧宅探仙靈之會區既逶  
迤以迅步亦覽策而紆徐歷崆峒之崇阿依青香之修  
途指雲竇以小憩眇蚪柯而散舒其既至也玄霧冲郁  
青霞繽紛松七星以先逕鳥五色而迎人訪潛蹤於朱  
明寄逸興於綵雲佇芳蔭之陸離披寒光之氤氳爾迺  
轉迴磴俯遙壑即杳冥度廣漠凌天漠之危津瞰蓬萊  
之虛閣架飛虹於鐵橋浣清湍於白角於是臺憑瑤石  
洞轉金沙逐青羊於盤礪夢翠禽於雪花盼軒轅之曠

宮覓稚川之丹砂諦文符之散葉聆空音之汎霞既窈  
窕以容與亦盤桓而眷嘉乃涉飛雲再躋見日晴藍倚  
空羣岫若失倏陰陽之盪割渺昏曉之紛汨啓達觀於  
靈境探玄根於瑤室憫濁世之乖癡羨冥鴻之暢逸抱  
靈文以自箴緬馳情而恍惚儻羽伴之可尋託逍遙於  
眇質

五丁力士開蜀門賦

以蠻國開廓遂  
通人俗爲韻

唐陳山甫



伊山爲蜀是曰蠻俗惟天俾秦厥生神人拔長蛇而翦  
肩闢廣岫之嶙峋在昔褒斜未通荒焚異域彼爲彝國  
物產難究封疆罕測秦將欲廣其南冠其北張儀於是  
度其勢量其力假牛之計斯設饋女之功是克蜀王乃  
命力士闢高山貪功饕餮忘情險難捫峰巒於日側扶  
虺蜮於雲間將以砥蘄萃等躋攀振衣而力抗千嶂攘  
臂而威陵八蠻俄而白日蕩搖玄天忽霍鬼哭神怨風  
號霧廓怒髮森植雄心震躍灑珠汗以電散瞪星眸而

電落將欲斷煙靄排巖峩訝巨靈之所拓蹂重林迴絕  
壑疑夏后之所鑿吁可畏哉砰轟若雷虎視五嶽鯨吞  
九垓徒見其豁若谷端若堆橫隱嶙直崔嵬大應心踣  
高隨水摧江標峻棧之形呀然地裂闕闕高峰之色駭  
若天開已而後患方啓前心莫遂喧闐兮乍進秦卒灑  
迤而全收蜀地道路無阻闕梁有備聞五丁死而蠻黨  
移一徑通而秦人至雖共工之勇將觸也非雄雖項籍  
之力將拔也寧同曾未若擘秀嶺駭蒼穹今古攸賴華

夷是通羽毛讐死以填谷草樹驚摧而墮空遂使鞭石  
之帝移山之公壯志難奪莫不慕其英風

巫山賦

宋蘇轍

過瞿唐之長江兮蔚巫山之差峩雲孤興其勃勃兮北  
風慨其揚波山嶽崙而直上兮越至神女之所家峰連  
屬以十二兮其九可見而三不知蹊遂蕪滅而不可陟  
兮玄猿黃鵠四顧而鳴悲覽松柏之青青兮紛其若江  
上之菰蒲維其大之不可知兮有撓雲之修柯蔓草蒙

昔以下翳兮飛泉潔清而無沙亭亭孤峰其下叢木交  
錯而不明兮若有美人慘然而長嗟斂手危立以右顧  
兮舒目遠望恍然而有所懷儼我我其有禮兮盛服寂  
寞而無譁臨萬仞之絕嶮兮獨立千載而不下顛追懷  
楚襄之放意肆志兮沂江千里而遠來離國去俗兮徘徊  
而不能歸悲神女之不可以朝求而夕見兮想遊步  
之逶遲築陽臺於江干兮相氛氣之參差惟神女之不  
可以求得兮此其所以為神湛洋洋其無心兮豈其猶

有懷乎世之人朝雲蔚其晨興兮暮雨紛以下注變化  
倏忽不可測兮俄爲鳥而騰去忽然而爲人兮佩玉鏘  
以琅琅愛江流之清波兮安燕處乎高唐彼蛟龍之多  
智兮尚不可執以置乎高丘深其蒼蒼兮悅誰識其有  
無

灩澦堆賦

有序。

宋蘇軾

世以瞿唐峽口灩澦堆爲天下之至險凡覆舟者皆歸  
咎於此石以余觀之蓋有功於斯人者夫蜀江會百水

而至於變瀾漫浩汗橫放於大野而峽之小大曾不及其十一苟先無以齟齬於其間則江之遠來奔騰迅快盡銳於瞿唐之口則其嶮悍可畏當不啻於今耳因爲之賦以待好事者試觀而思之

天下之至信者唯水而已江河之大與海之深而可以意揣唯其不自爲形而因物以賦形是故千變萬化而有必然之理掀騰滄怒萬夫不敢前兮宛然聽命惟聖人之所使余泊舟乎瞿唐之口而觀乎灩澦之崔嵬然

後知其所以開峽而不去者固有以也蜀江遠來兮浩  
漫漫之平沙行千里而未嘗齟齬兮其意驕逞而不可  
摧忽峽口之逼窄兮納萬頃於一杯方其未知有峽也  
而戰乎濫瀕之下喧豕震掉盡力以與石鬪勃乎若萬  
騎之西來忽孤城之當道鉤援臨衝畢至於其下兮城  
堅而不可取矢盡劍折兮迤邐循城而東去於是滔滔  
汨汨相與入峽安行而不敢怒嗟夫物固有以安而生  
變兮亦有以用危而求安得吾說而推之兮亦足以知

物理之固然

灑灑堆賦

宋薛紱

蜀江匯而赴峽勢迫抑而騰掀當江之衝有堆屹然爰  
停我撓徘徊覽觀有會余心乃知大禹所以浚川而不  
去此者匪特以殺水之怒而四瀆之長江有灑灑河存  
砥柱則聖人之意亦將有所寓焉夫形而上者謂之道  
形而下者謂之器器者物之物道者物之先先乎物者  
在人則存乎心者也所以宰制乎萬物豈一物所得而



肩彼堆斯江彼柱斯河在物之石而器之下也然洪水滔天不爲之移狂濤卷空不爲之動潦盡漲涸岌乎峭堅亘宇宙而長存閱陵谷之變遷而人之所以先乎物者乃誘於知乃逐於物利之趨如水斯下欲之熾如火斯然曾莫得以止遏者反茲石之不若又安可不推其原縱而忘反茲固弗道制之無方愈蕩而偏禁而絕之者昧乎倫類空而妙之者荒無逕躔嗚呼無廬而居無畔而田卒窮露而奚歸寧耕穫而有年曷不觀於茲堆

乎彼惟居其所者屹而固也然後可以障狂瀆之流川  
苟失其所而昧其居吾知此心之不傳其居伊何則曰  
自天理雖微而難明實天命之固然自視聽言動之間  
以及於君臣父子之懿物必有則理不可遷切而思之  
講而明之習而察之謝無根之潢潦挹有本之源泉眇  
乎其微深乎其淵物有萬變事有萬理察乎其微者卓  
然而不可易然後可以蔽乎天地而關乎聖賢必真知  
也而後其行也果必力行也而後其知也全敬恭朝夕

奉而折旋茲孔孟之所以不倦不愠不忤者豈蹈白刃  
之勇者所可得而言嗚呼人心之危匪石而人欲之勝  
甚於水吾觀茲堆而有感於天則之嚴是以憂講學之  
怠而述之於篇

後濼瀕賦

有序

明陸深

昔蘇公子瞻賦濼瀕蓋曰江會百川勢易驕逞不先之  
以齟齬盡其快銳爲害斯大嗟乎是誠有之夫當國家  
豐亨豫大之時必有風靡波蕩之俗使無正人法家出

氣力以扞之則末流有不可救者矣此公作賦之旨也  
嘉靖丁酉二月初余將出峽舟過瞿塘春水未生孤根  
欲露盤旋其下有感於心作後濫瀕賦

道叢鳧之故國沿岷汶之長源睇濫瀕之兀律繹先哲  
之名言測安危之倚伏乃始疑而今信然昔伯禹之導  
江兮命陽侯為驅先挾六龍與二蚪兮劈雷斧之神鉅  
剗地脈而中分兮挺孤高之一拳障犇轟之東鶩兮回  
萬折於瀾翻時盈縮以浮沉兮擁百川而獨尊或如象

兮如馬舟人睨而不敢上下相逝者之汨汨兮固晝夜  
之不舍惟上帝之默佑兮恒幹運於區中示機緘於錯  
糾兮物有窮而必通猗宣父之感麟兮既伐樹又絕糧  
羌鄒孟之仁義兮竟見沮於臧倉胡賢聖之迭遭兮夫  
豈茲堆之未汰派遠而彌昌兮象下流兮永賴抱遺經  
而先覺兮返亂治於否泰顧大化之茫茫兮俟萬世於  
須臾俯中流之一柱兮盍前鑒而蚤圖慨孔明之馳驅  
兮磊砢乎八陣猶未磨問草堂於灤水兮弔江上之東

坡余粲粲其白髮兮懼末路之蹉跎

大別山賦

元  
聶炳

厥初馮翼孰玄孰黃清濁既凝高下以彰融然而江河  
流液峙焉而山岳儲祥惟大別之名山獨巋然於南荒  
亦其氣通淮漢勢壓荆揚總江漢之統會分衡岳之輝  
光深根浸滂乎后土雲彩洞屬乎圓蒼高標迴出於九  
疑倒影傍接於三湘昔聖賢之經歷雖千載而不忘爾  
乃層巒聳萃疊嶺巔屹石痕欲駁土花若殷藍膏綠液

紅媽碧珊樓臺翬飛於翠崦石梁龍矯於蒼灣浮屠聳  
其立立仙臺峙其閑閑睇靈柏之茸茸雜蒼苔兮斑斑  
幽芳野草秋菊春蘭至若地利之富物產之珍以守則  
固以財則殷殊形詭相不可殫論靈蹤神迹曷可並陳  
吾嘗凌絕頂賦遠遊呼鸚鵡以逍遙招黃鶴而夷猶酌  
賈守於秋興之亭邀太白於郎官之舟洞庭之水未波  
蒼梧之雲不流烏林煙滅曹瞞之魂已冷赤壁風高蘇  
仙之句常留登高作賦把酒澆愁嗟乎娛樂則有之矣

感慨亦有之矣其有德神禹之德而憂神禹之憂者乎  
當其九州爲壑四海一堙而神禹出焉巨刃天揚萬夫  
霆震截垠塲之巉巖擘蒼翠之嶙峋其導水之功果孰  
爲之邪然吾徒今日得囿於禮樂之教者其非前日手  
胼足胝之力狃於衽席之安者其非前日克勤克儉之  
功乎噫吁嘻異哉時異事殊風流雲往撫乾坤其瞬息  
觀古今於倏仰蓋有迹神禹之迹於千百載之下矣豈  
無心神禹之心於千百載之上也哉



大別山賦

元周 鏜

繫大別之爲山鎮南紀之要衝壯荆鄂之形勝俯江漢  
之朝宗勢岌業而若馳羌偃蹇而橫空根幾里其盤盤  
屹數仞之崇崇崔嵬獨立兮安得赤壁浯溪之雄萃律  
孤撐兮烏有祝融天柱之峰雖嵩華之莫追亦培塿之  
難同領地靈而歛翕控濁浪之奔衝青連幕阜之遙翠  
挹鶴樓之重鬱秋興兮滿亭澹斜月兮西風念明德兮  
既遠遊余目兮水漑攀古柏之蚪枝歎神禹兮安在偉

疏鑿之宏功歷萬世之永賴宜此山之突兀爲荊州之  
勝槩爾乃嵯峨江澗控扼漢流儼翠屏之低列映二川  
而相繆渺方城兮何許瞻彼漢兮悠悠余於是有所感  
矣昔蠻荆之陸梁恃威武而虔劉兼山溪之險阻託制  
勝之良籌迨夫柏舉張兵闔閭奮矛自小別而大別莽  
暴骨而爲仇覽吳楚之遺迹曾不滿夫一歎憶神禹於  
當年益詠思乎江漢我皇元之奮興收輿地而爲一肆  
疆理之南國赫天兵之俯集險不足固惟德無失故山

苞而川流盡圖入於版籍此所以聖化之滂沛大洽於  
江漢之域也乃歌曰在昔懷襄兮神禹所平名山既奠  
兮厥功以成巍然大別兮漢由是出浩浩其朝宗兮至  
於今日山猶此山兮民猶此情皇風所蕩兮孰不來庭  
聖元疆理兮同符神禹壯哉大別兮鎮於南紀

大別山賦

元江存禮

夫何岷嶓倚天萬八千里吐金景而南蟠道紆鬱其東  
鶩兮實荆楚之雄藩維江漢之源委兮乃經緯乎其間

朝發軔乎衡臬兮夕弭節兮漢渚風飄飄其乘軔兮雲  
澄澄兮凝宇寓吾目以遐覽兮曰其中之有山匯江漢  
於一瀦兮攀吳蜀之雄關祥麟威鳳儼前後兮幽篁嘉  
植森列乎其間委萬屋以波偃兮結雲構於層巒覩冥  
冥之高雄朗天宇兮清閒余乃悚然而思曰此非所謂  
大別之山者乎於是凌犖确登巔屹拊危磴之秋骨倚  
修柏之蒼顏渺孤峰之白雲挹灑氣之高寒聳余神以  
跂立兮發孤嘯於雲端蓋庶幾寓千載於一瞬而究禹

德於不刊也觀夫長風驅濤雷電恍惚銀闕差峩神怪  
隳突其勢若陰山萬騎以盪乎茲山之冒者非長江之  
發於岷蜀者乎輕颺徐來淺碧微動平皋旁迤翠壁後  
攤其狀若白虹宛延以繞乎茲山之背者非漢水之出  
於嶓冢者乎方其衆水爭雄羣山橫縱淺瀆而深卑增  
而穹奮怒於葭萌之口震盪乎灑瀆之衝訇震天之怒  
霆溢晴皋之巨溲嗟民物之何辜若痲疾之在躬想聖  
人之經營靡覆載之可容迨夫天廓其蒙地夷其隆險

阻既平波濤乃東經鄂渚之夷曠始邂逅於奇逢繫神  
標之暫駐欣四海之會同當二水之交汭適茲山之居  
中嶷兮若秦關一士而敵萬夫之銳屹兮若孤城百雉  
而當矢石之鋒縣萬禩以貞固與乾坤而始終嗟夫微  
禹之德曷足以表茲山之勝微山之高曷足以紀神禹  
之功彼秦皇刻石而啓鄒嶧之誕漢武頌德而侈泰山  
之封較輕重於錙銖若蠶螟之與神龍於是晴雲斂空  
老樹如戟山寒兮欲秋月澹兮將夕感聖德而詠歸睨

層旻之遠碧

廟山賦

宋 孔武仲

太儀垓北兮孰闢其初東爲滄海兮南爲江湖謂其有意於物邪胡爲土斷壤絕不容駕馬與牽車謂其漠然無意邪胡爲積水之中截然起爲丘墟惟洞庭之汗漫兮號巨浸於一隅指天爲幕兮視地爲無上飛鳥而下行舟兮濟未半而力無餘使無所栖息兮其將困阨乎蛟魚乃有廟山兮屹然以中峙洲渚四環兮瀦以流水

力憊者得休兮見險者得止若備邊郡縣前臨不測之  
敵兮猶幸有城郭之可恃夜安以眠兮晝徐以起雖扶  
搖拔山兮如螽雀之過耳上青蒼兮薄浮雲中安帖兮  
旁無鄰收縮以爲秋兮浩渺以爲春觀於此兮可以知  
陰陽之屈伸山有民兮居甚樂緝茅以爲室編篁以爲  
樂以獵爲刈兮以漁爲穫夕與雞栖兮旦與鳧作生長  
於是老死於是而已矣孰謂官府與城郭漢澆唐漓兮  
吾獨全太古之淳朴視日出爲朝兮視月升爲夜膚冰



而後知臘兮頽泚而後知夏無功可錄兮無罪可赦與  
鼇鼉並游兮與蜉蝣俱化我欲留此兮捐詩書視居居  
兮行于于不飲酒而樂兮不撞鐘而娛波濤以爲琴瑟  
兮風飈以爲笙竽賓虞舜兮友軒轅傲賈生兮卑屈原  
訪鴟夷兮追魯連

玄武山賦

有序 一作  
遊廟山賦

唐王勃

玄武山西有廟山東有道君廟蓋仙人之別府也長蘿  
巨樹稍翳雲日王子御風而遊冷然而善益懷霄漢之

舉而忘城闕之戀矣思攀洪崖於煙道邀羨門於天路  
仙師不存壯志徒爾俄而泉石移景秋陰方積松柏羣  
吟悲聲四起背鄉關者無復向時之策馬嗚呼有其志  
無其時則知林泉有窮途之嗟煙霞多後時之歎不其  
悲乎遂作賦曰

陟彼山阿積石峩峩亭臯千里傷如之何啓松崖之密  
蔭攀桂岳之崇柯隔浮埃於地絡披浩氣於天羅爾其  
綠巖分徑蒼岑對室茵軒丹糾芝場翠密俯泉石之清

冷臨風颺之瑟飈仰紺臺而攜手望清都而容膝於是  
躡霞光於玉砌步雲崑於金壇懷妙童與玉女想青螭  
及碧鸞情恍恍而將逸心迴迴而未安見碧芳之晚晦  
知紫洞之宵寒既而霧昏千嶂煙迷四野恨流俗之情  
多痛飛仙之術寡驅逸思於方外躡高情於天下使蓬  
瀛可得而宅焉何必懷於此都也亂曰已矣哉吾誰欺  
林壑逢地煙霞失時託宇宙兮此日俟蚪鸞兮來期他  
鄉山水祇令人悲

赤壁賦

宋蘇軾

壬戌之秋七月既望蘇子與客汎舟遊於赤壁之下清  
風徐來水波不興舉酒屬客誦明月之詩歌窈窕之章  
少焉月出於東山之上徘徊於斗牛之間白露橫江水  
光接天縱一葦之所如凌萬頃之茫然浩浩乎如馮虛  
御風而不知其所止飄飄乎如遺世獨立羽化而登仙  
於是飲酒樂甚扣舷而歌曰桂櫂兮蘭槳擊空明兮泝  
流光渺渺兮予懷望美人兮天一方客有吹洞簫者倚

歌而和之其聲嗚嗚然如怨如慕如泣如訴餘音嫋嫋  
不絕如縷舞幽壑之潛蛟泣孤舟之嫠婦蘇子愀然正  
襟危坐而問客曰何爲其然也客曰月明星稀烏鵲南  
飛此非曹孟德之詩乎西望夏口東望武昌山川相繆  
鬱乎蒼蒼此非孟德之困於周郎者乎方其破荊州下  
江陵順流而東也舳艫千里旌旗蔽空釃酒臨江橫槊  
賦詩固一世之雄也而今安在哉况吾與子漁樵於江  
渚之上侶魚鰕而友麋鹿駕一葉之扁舟舉匏樽以相

屬寄蜉蝣於天地，渺滄海之一粟。哀吾生之須臾，羨長江之無窮。挾飛仙以遨遊，抱明月而長終。知不可乎驟得，託遺響於悲風。蘇子曰：客亦知夫水與月乎？逝者如斯而未嘗往也，盈虛者如彼而卒莫消長也。蓋將自其變者而觀之，則天地曾不能以一瞬；自其不變者而觀之，則物與我皆無盡也。而又何羨乎？且夫天地之間，物各有主，苟非吾之所有，雖一毫而莫取。惟江上之清風，與山間之明月，耳得之而為聲，目遇之而成色，取之無

禁用之不竭是造物者之無盡藏也而吾與子之所共  
適客喜而笑洗盞更酌榘核既盡杯盤狼籍相與枕藉  
乎舟中不知東方之既白

後赤壁賦

宋蘇軾

是歲十月之望步自雪堂將歸於臨皋二客從余過黃  
泥之坂霜露既降木葉盡脫人影在地仰見明月顧而  
樂之行歌相答已而歎曰有客無酒有酒無榘月白風  
清如此良夜何客曰今者薄暮舉網得魚巨口細鱗狀

似松江之鱸顧安所得酒乎歸而謀諸婦婦曰我有斗  
酒藏之久矣以待子不時之需於是攜酒與魚復遊於  
赤壁之下江流有聲斷岸千尺山高月小水落石出曾  
日月之幾何而江山不可復識矣余乃攝衣而上履巉  
巖披蒙茸踞虎豹登虯龍攀棲鶻之危巢俯馮夷之幽  
宮蓋二客不能從焉劃然長嘯草木震動山鳴谷應風  
起水湧余亦悄然而悲肅然而恐凜乎其不可留也反  
而登舟放乎中流聽其所止而休焉時夜將半四顧寂



寥適有孤鶴橫江東來翅如車輪玄裳縞衣戛然長鳴  
掠余舟而西也須臾客去余亦就睡夢一道士羽衣翩  
躚過臨皋之下揖余而言曰赤壁之遊樂乎問其姓名  
俯而不荅嗚呼噫嘻我知之矣疇昔之夜飛鳴而過我  
者非子也邪道士顧笑余亦驚悟開戶視之不見其處

武夷山賦

有序

宋李綱

武夷山水之勝爲七閩最圖志載之詳矣余閩人也遊  
宦四方每以未至其下爲恨宣和改元承乏螭頭寓直

左省晝寢夢遊山間四顧峯巒玉色秀美瓌奇不可模  
狀既覺欣然竊意所夢殆非塵世也已而都城積水奏  
疏論事謫官沙陽渡淮歷浙道南江入閩境遂遊武夷  
道士導余乘小舟汎九曲溪抵晞真館奇峰怪石顧揖  
不暇迴舟雪作山色盡白恍如夢中怛然驚笑信乎好  
慕之極達乎精神而出處分定非人力之所能致也留  
山中賦詩幾五十篇又廣其意而爲之賦其辭曰  
太虛寥廓浮清凝濁融爲川瀆結爲山嶽山嶽之奇萃

於坤倪秀氣磅礴實鍾武夷武夷之山蜿蜒鬱蟠作鎮  
南服千里奠安噴雲洩雨噫風嗽霧蔽虧日月變移寒  
暑崖谷窈窕峰岫巖嵒雕鏤刻削孰尸其功一溪九曲  
演漾寒淥貫於山中鳳翥蚪蹙洞戶杳然棲神宅僊蟬  
蛻羽化靈骨猶傳雲封霧消玉潤金堅稽於秘籍是為  
昇真羽化之天其瓌偉絕特之觀則有幔亭之麓天柱  
之峰鐵嶂延袤鑑池空濛巖嘯雕虎潭藏老龍儼金僊  
之容睥粲玉女之肌紅儲芝玉於二廩鑄巒乳於三鍾

聳層峰之疊翠落飛瀑之長虹千巖萬壑競秀爭雄蕩  
心駭目不可殫窮其仙聖遊戲之地則有換骨之巖妒  
婦之石掌印掬蹤膝存跪迹繪胎禽之縹緲插仙舟於  
罅隙留丹竈於層巔置雞棲於峭壁組織就而杼軸空  
篇翰終而几案寂按圖以求秘怪難測其植物則有翠  
柏毛竹綠李丹橘翳蒼芬芳擢榦垂實其動物則有舞  
鶴鳴鶖遊羊戲鹿棲息飛翔分羣萃族其內則有瓊樓  
珠殿玉圃芝田創見天地自開山川靈仙之所周旋也

其外則有長松茂草異卉嘉葩枕流漱石朝煙夕霞幽  
遯之所考槃也合而觀之山意深水容湍石色溫潤溪  
流屈盤地靈而木秀境寂而雲間信能騰譽今古垂光  
簡編廁三十六洞而別爲一天也惟昔仙君來宴曾孫  
彩梁虹亘幔屋雲屯翠旒絳節紫褥芳裯虛座鼎設華  
筵翼分漿瓊液玉羞鳳脯麟鏘金石之間作奏古曲曰  
賓雲歌人間之可哀歎光景之易曛紛鸞鶴以迴馭但  
流水與空山悵真遊之已遠時笙簫之夜聞此又詭異

况忽叵得而具論也若夫岱宗太華之穹崇終南太行  
之險阻或峻極而降神或登臨而小魯四明天台衡嶽  
廬阜度長絜大雖雄偉之不侔而幽邃巧妙固不可同  
日而語也爰有狷介之士學陋識迂誤入世網偶聯簪  
裾跡朝市而心山林究地志而閱仙書馳精神於夢寐  
覲幽眇於畫圖歲崢嶸以道盡因謫宦而假途步煙霞  
之岑寂仰神仙之有無覽魏子之遺躅訪劉公之舊廬  
嘉泉石之可樂寄吟哦以自娛倒冠落佩與世闊疎眷

茲山而無斃將狗其愚而隱居者乎

大弋山賦

元黃元實

粵惟元氣盤東而融結兮屹后土之龐鴻判五嶽之峻  
極兮領波濤之諸峰睽茲山之巍巍兮據南紀之遐封  
視培塿繇亘於炎海兮實閩嶠之一雄道人寶閣東望  
欲並驅兮麻姑四顧搖曳乎空濛濓水環繞乎其下兮  
靈源仙穴與蓬島而潛通飛泉數道瀉寒玉平田萬頃  
飛流瀑有時黃塵赤日吐雲氣洗滌早暎回和豐亶樵

陽之巨鎮妙宰物之玄功重巒疊嶽世傳八四面兮  
涇洞變化杳靄誰能窮玉芝瑶草聚珍產濯以醴露春  
蒙茸碧樹玄猿蒼崖綠熊一聲秋籟動林薄萬里月色  
橫長空凌空絕頂罕人迹兮惟有鞭鸞跨鶴雪着碧眼  
於此時相逢拂余袂而遊觀兮覺層雲之盪胃諒夙昔  
之有契兮撫光景而欣從想匡廬之逸興兮便擬追躡  
乎前蹤松牕半榻對晴雪瑶琴五月彈清風與山君兮  
逍遙肆巖棲兮從容泰山標日觀仙掌葺芙蓉顧珊珊



之霞佩兮逝將服乎壽宮委芳澤之所美兮懷丘垤之  
所宗鏡山兮鏡山萬古兮誰同天長地久垂鴻名於宇  
宙配喬嶽於恒嵩

御定歷代賦彙卷二十

欽定四庫全書薈要卷一萬七千二百四十集部

御定歷代賦彙卷二十一

地理

霍山賦

有序

唐皮日休

臣日休以文為命士所至州縣山川未嘗不求其風謠  
以頌其文幸上發輜軒使得採以聞六年至壽之駢邑  
曰霍山山故嶽也邑贅於陟至之二日離邑一舍望乎  
嶽將頌之文也及見之則目乎慙手乎蹕心乎竦神乎

瞽始欲狂其文寫其狀如丹青之不差也頌其風文其  
謠如金石之永播也既而其精怯然搏敵躁然械囚紛  
然焚絲恍然墮空浩然涉溟幽然久疹則知才智之劣  
如耄而加疾將杖而奔者於戲霍山之靈哉霍山之靈  
哉將闕於神而愚之邪抑有所達而託之邪其辰既決  
其精忽渝怯然而勝躁然而適紛然而靜恍然而安浩  
然而濟幽然而愈如壯而能決將陣而能敵者於是狂  
其文寫其狀辭曰

太始之氣有清有濁結濁為山峻清為嶽其山厥臣其  
嶽惟君惟南之鎮曰霍為尊嶽之大與地角壯與天勃  
勢荆豫華嵩青沂充岱如垤而秀如塊而銳嶽之高千  
仞萬仞蒼蒼茫茫日月相避其光望之數百里外為天  
棟梁嶽之尊端然御極竦然正位靜然而聽凝然而視  
其體當中如君之毅其屬者如駢其拇如枝其指若卑  
其儀若肅其位嶽之氣其秀為春其清若秋其翠如雲  
雲不能麗其色如煙煙不能鮮若雨收氣爽丹青滿天

嶽之靈其神不昧其報如響若雨用淫嶽能廓之若歲  
用旱嶽能澤之嶽之德生之育之煦之和之開蔭染卉  
淒淒迷迷藻績數百里嶽之形有雲鶩鶩其勃如怒有  
泉烈烈其來如決叱豐隆奔列缺轟然霹靂天地俱裂  
嶽之異狀其勢如危或不可支若不可維或仰而呀有  
如吮空或俯而拔有如攬地其曉而東有如貫日其暮  
而西有如孕月有水而脈有石而骨有洞而腹有孽而  
節或銳而勵或斷而截或迴而馳或低而折其經之怪

之祥之詭之千種萬類繁不可得而詳記因神狂不能自主殆而寐夢一人絳衣朱冠怪貌魁形曰余祝融之相也夫霍山君之故治也爾賦之誠形矣勝矣怪矣典矣然義有不備帝俾余莅夫古有五嶽霍居其一所以五嶽相邇者唐虞之帝五載一巡狩一載而徧上以覲侯下以存民侯有治者陟不治者黜民有寃者平窮者濟洎唐虞已降皆燔柴於霍我帝用饗其禮至周旦冊而命我與諸嶽星列中國自漢之後乃易我號而歸於

衡故祝融遷都命余守霍今聖天子越唐邁虞而廢巡  
罷狩余之封內有可陟可黜可平可濟者是聖天子無  
由知之爾能以文請執事之達者易衡之號以歸於我  
請天子復唐虞黜陟之義故爾之將賦余閉過爾懷而  
不爾文帝曰有衡既遠有狩必勞惟霍之邇斯號可復  
賦者有能言胡不俾帝命余錫爾文爾無忘也臣曰請  
惟神命既覺而書嗚呼異哉

九華賦有序

明

王守仁



九華為江南竒特之最而史記所錄獨無其名蓋馬遷足跡之所未至耳不然當列諸天台四明之上而乃略而不書邪壬戌正旦余觀九華盡得其勝已而有所感遇遂援筆而賦之其辭曰

循長江而南下指青陽以幽討啟鴻濛之神秀發九華之天巧非效靈於坤軸孰構竒於玄造遷史闕而弗錄豈足跡之所未到白詩鄙夫九子實茲名之所肇余將窮祕密於崔魏極玄搜而歷考涉五溪而徑入宿無相

之窈窕訪王生於邃谷淘金沙之清潦凌風雨乎半霄  
登望江而遠眺步千仞之蒼壁俯龍池於深窅弔謫仙  
之遺跡躋化城之縹緲飲盃盃之朝露見蓮花之孤標  
扣雲門而望天柱列仙舞於晴昊儼雙椒之闢門真人  
駕雲而獨躋翠蓋平臨乎石照綺霞掩映乎天姥二神  
升於翠微九子鄰於積稻炎歆起於玉甌爛石碑之文  
藻回澄秋於枕月建少微之星旒覆甌承滴翠之餘瀝  
展旗立雲外之旌纛下安禪而步逍遙覽雙泉於松杪

踰西洪而憩黃石懸萬丈之瀨瀨瀨流觴而紫紆遺石  
盤於澗道呼白鶴於雲峯釣嘉魚於龍沼倚透碧之嶼  
岵謝塵寰之紛擾攀齊雲之巉削鑑琉璃之浩漭沿東  
陽而西歷餐九節之蒲草樵人導余以冥探排碧雲之  
瑤島羣巒翳其繆藹失陰陽之昏曉垂七布之沉沉靈  
龜隱而復佻履高僧而屨招賢開白日之杲杲試朝茗  
於春陽汲垂雲之淵湫凌繡壁而據石屋何文殊螺髻  
之蟠糾梯拱辰而北盼隳遺光於拾寶緇裳迂於黃苑

休圓寂之幽悄鳥呼春於叢篁和雲韶之嗚嗚喚起促  
余之晨興落星河於簷撩護山嘎其驚飛怪遊人之太  
早攬卉木之如濯被晨暉而爭姣靜鏡聲之剝啄幽人  
劓參蕨於冥杳碧雞噉於青林鵬翻雲而失皓隱搗藥  
於糝羅挾提壺餅焦而翔繞鳳皇承盃冠以相遺飲沉  
澹之仙醪羞竹實以嬉翔集梧枝之嫋嫋嵐欲雨而霏  
霏鳴濕濕於薺葆躡三遊而轉青峭拂天香於茫渺席  
泓潭以濯纓浮桃瀉而揚縞淙淅淅而落蔭飲猿猱之

健狡晚斧柯而昇大還望會仙於雲表憫子京之故宅  
疑知微之碧桃倏金光之閃映曠異景於穹坳弄玄珠  
於赤水舞千尺之潛蛟並花塘而峻極散香林之迴飈  
撫浮圖之突兀泛五釵之翠濤襲珍芳於絕巘裊金步  
之摇摇娑羅躑躅芬敷而燦耀金幢玉女之妖嬌蹇龍  
鬚於靈寶墮鉢囊之飄飄開仙掌於嶽嶽散清馨之迢  
迢披白雲而蹠崇壽見參錯之僧寮日既夕而山暝挂  
星辰於隆敷宿南臺之明月虎夜嘯而羆嗥鹿麋羣遊

於左右若將侶幽人之岑寥迴高寒其無寐聞冰壑之  
洞簫溪女厲晴瀧而曝朮雜精苓之春苗邀余觴以玉  
液飯玉粒之瓊瑤溘辭余而遠去颯霞裾之飄飄復中  
峰而悵望或仙踪之可招迺下見陵陽之蜿蜒忽有感  
於子明之宿要逝余將遺世而獨立採石芝於層霄雖  
長處於窮僻迺永離乎厖囂彼蒼黎之緝緝固吾生之  
同胞苟顛連之能濟吾豈靳於一毛矧狂胡之越獍王  
師局而奔勞吾寧不欲請長纓於闕下快平生之鬱陶

顧力微而任重懼覆敗於或遭又出位以圖遠將無謂  
於鷓鴣嗟有生之迫隘等滅沒於風泡亦富貴其奚為  
猶榮舜之一朝曠百世而興感蔽雄傑於蓬蒿吾誠不  
能同草木而腐朽又何避乎羣喙之啾啾已矣乎吾其  
鞭風霆而騎日月被九霞之翠袍搏鵬翼於北溟釣三  
山之巨鼇道崑崙而息駕聽王母之雲璈呼浮丘與子  
晉招句曲之三茅長遨遊於碧落共太虛而逍遙亂曰  
蓬壺之藐藐兮列仙之所逃兮九華之矯矯兮吾將於

此巢子匪塵心之足攬子念鞠育之劬勞子苟初心之  
可紹子永矢弗撓兮

黃山賦

有序

明

謝廷讚

余覩近圖經蓋有七黃山云在廣陽有玉室洞留侯辟  
穀導引處也延陵俯瞰大江則以假君父子得名姑孰  
有劉宋離宮在焉蓋浮丘之尸鄉也東萊為真人洞餘  
抗居大滌天柱間孺陵一名謝山其上蓋有謝晦祠云  
乃至異域帶方之在忠清者亦且與白岳並峙至於汾



水之源西接錢來漢帝之宮聿在槐里取古今圖牒較  
言之并此山而七吁亦夥矣不臚而列之觀者厖焉按  
此山舊名黟山說者曰北九華西彭蠡南接懷玉而東  
挾漸江起桐汭以盡海壖隕然中居以降勢委和於四  
表有坤道土德焉故名之曰黃山然愚考山海經言三  
天子都者凡四一則曰在閔西海北一則曰浙江出焉  
一則曰廬江出焉一則曰南海之內有衡山有菌山有  
桂山有山名三天子之都焉夫昔之曰天子都者軒轅

也今之曰黃山者亦軒轅也黃山為三天子都明矣指率山為三天子都者附會蠻中二字之訛指大鄣為三天子都者附會鄣都二字之訛而天都一峰較著不取而證之山靈盧胡之日久矣余信宿黃山沐湯泉漱龍潭暢然有得既取適於杖履復考正乎名山喜而賦之

賦曰

伊軒皇之神聖應雷精而吐靈歷三百而未沫揖浮丘與容成感嘗草於炎帝著素問之丹經登大隗而迷聖

爰改玉以攸行采靈藥於少華錫黃山之嘉名惟黃山之萃律頻台目於下風雲中峰而吐瑞氣呼吸而上通竒屢幻而撫實境本有而翻空泉煦煦而扇燠砂涓涓而寫紅鳥道靠鬼而倦鳥龍潭風雨而吼龍爾乃尋烏氏之逸蹤挈烏衣之舊宗訪五嶽而發軔攜五君以相從陟砂峰以夷猶望天都以傍徨激鳴絃於石瀨濯靈泉以徜徉雖信宿於祥符倏乍陰而乍陽或青天無片雲或積雪滿高岡或澍雨日滂沱或彤雲接混茫雨則

白氣若瓔珞晴則清風振琳琅於是躋躡羣峰徒倚泉  
石巖洞迴斡溪源浙瀝兆諸刹於翠微庶石橋之飛鳥  
峯則鑪經八甲香送九天獅子則文殊之法座沃若石  
人則巨靈之躡掌巋然服丹霞之紅朮采雲外之杜鵑  
乘浮丘之彩雲結容成之紫煙松谷茹乳於疊障黃冠  
釀酒於軒轅基石之布子如初鉢盂之聖燈長然石筍  
化仙人之岫錦魚躍清潭之淵白馬留芙蓉之跡青牛  
下翠微之巔二泉并溫而聖潛紫見二門並峙而石架

雲連聆鸞嘯以上昇攀龍髯以望仙遂使青鸞孤窻而  
蹲踞九龍並飛而蜿蜒桃源桃花勾漏朱砂仙都有路  
采石無瑕登石柱之石壁卧石林之石枕松林之石榴  
可茹雲際之乳源堪飲紫雲之柏木成帷布水之紅泉  
似錦擬太華之髣髴遡蓮花而可諗指九華而結盟媿  
顏行而謹凜爾乃峰下有溪峰頭有泉溪為泉委峰即  
泉源八巖竅窳而內雲三潭次瀟而成淵石杓衡而應  
斗洞吻叶乎巫山於是汲乳源之布水憩乳巖之長陰

濯湯泉與湯池遡香谷與香林誦浮丘之秘記誌松谷  
之妙音規石塔之圓月聆懸溜之鳴琴歌醉石以婆娑  
發謫仙之吳吟徒觀其非深三尺花紅巖山望仙多菊  
朱砂長蘭功勞十大於仙人桃花十里於鍊丹二桃則  
毛白異色五竹則挂筍獨斑茗大葉而解醒梅先春而  
能寒萼石耳苦遮以樂饑服朮葛胡連以駐顏椒麓嶽  
崎於何不有珍木如雲嘉卉如繡石筍縣互於丈尋瀑  
布飛流於前後步疲蕭於章亥杖忽恍於隸首固可以

庶中天之髣髴而吞雲夢之八九縱觀其山形之盤礴  
水脈之演絡介鼎峙乎三州經彭蠡之巨壑發埭涇旌  
魯之源於絃歌總浮曹阮容之流於豐樂豐樂則雲門  
之派絃歌則紫石之波匪三山注蕪城而走白下則絃  
歌之極浦出屯溪經嚴瀨而止天目則豐樂之滂沱別  
有步武揣梅分水東西東界海陽之域西入宮亭之涯  
蓋三鄣之在經為南岷而少華之巨鎮為東維故百川  
襟帶於濫觴而千山毓靈於京坻者乎昔人月旦山川

則曰鬱萃以嵯峨泖淥以揚波人鍾靈於嶽降乃磊砢  
而英多亦有戰勝毫釐則曰山秀平而水清人感精而  
廉貞彼兩家之對壘羌旣立而提衡兼茲者其惟黃山  
與余經饒中信宿蔣公之三徑汪司馬之潘楊在焉披  
發太函之鴻篇則淵雲之揆藻揚天階也歷芳村而進  
觀魚宗秀之館許相國之贈言列几席則蕭曹之規隨  
光鉉台也徘徊巖鎮登九龍池上中天積翠之臺方明  
入御從司徒之杖屨則園綺之南極綜三槐也登汪川



之壺山挹同姓之芝蘭入石壁之精舍憶康樂之贈言  
呈坎即夢鳥之宅唐模比二龍之淵潛川景天官忠愍  
之節溪南在黃羅金竺之間昔人云此木即為交讓此  
水即為醴泉又云此地有廉泉讓水臣居在廉讓之間  
猗與黃山亶不其然乎

紫陽山賦

宋 韓 補

承嘉命以宅牧實歙州之故封覽山川之明秀懷典刑  
乎晦翁念宣德與流化豈薄書之蒙茸繫先正之闕里

儼紫陽之孤峰非仰高而景行曷淑艾乎厥躬休五夫  
之扁室乃締建乎祠宮方營度之云初得良友以獻議  
謂城阿之南偏有道院之廢址枕烏聊之形勝挹練溪  
之清泚環披雲之諸岫若或朝而或跪臨崇朝而弗勞  
遠市廛而弗適稱神靈之幽棲亦藏修之攸止協鷓原  
以展勞程工能而錯事曾日月之幾何轟棟宇其中起  
屬旃厦之勸誦萃鴻寶之名儒曰緝熙之典學嘗銳精  
乎四書既表章乎鹿洞宜敷錫乎粉榆皇穆穆以間納

却紛靡而弗娛奮神毫而染翰媿河洛之龜圖偉四字

之昭揭儼逢掖之所廬炳中天之赫曦昭萬古而莫渝  
開羣迷之曠曠正流俗之奔趨紛來遊之雋茂明明德  
而具學審道體之無窮企模範乎先覺既內美之均具  
胡前修之獨卓志莘摯之所志樂顏巷之所樂辨義利  
之界限守經訓之郭廓以致知為入門究深造之安宅  
苟天爵之尊榮亦何羨乎人爵亂曰山峻增子慨先生  
之儀刑水湍駛子想先生之音聲考亭非遠此戶庭子

維垣非貴此冠纓兮欲明明德將孰程兮味緒言而自  
淑亦先生之復生予

南山賦

宋 張耒

南山巖巖予其下有人佩玉而握珠刻意魯叟之古經  
不習世儒之臆書我頃見之於宛丘貌秀哲而眉疎別  
去忽予幾時面蒼瘠而頷垂鬚愛德器之老成資巧篆  
於璠璣問所與之謂誰亦黃槁之仙癯禁八馬之超騫  
同芻豆於羣鴛時慷慨而長鳴恥賤工之附輿我行世

之多艱三年困于江湖幸天恩之放還過都梁子躊躇  
奉兩月之周旋越長淮之馳驅屢飲我於山間挾踰躑  
之兩姝舟師告余以當行具篙楫於斯須歲方暮而寒  
驕犯冰雪於野墟雲漫漫子垂天風栗栗子攻膚穉麤  
鬢於宿莽妍柳秀於羣枯汎羽觴之清冷聊覽物以為  
娛思佳人于天末望莫見于愁予

柯山賦

宋  
張耒

入東門而右回兮原迤靡以相屬拔磅礴以隆起子是

為柯山之麓其上蕭森而晝靄于冠萬竿之修竹下硤  
确而堅密于拱高林與喬木散雞犬於危阨于雜茅茨  
與夏屋通樵漁之溪遂于路縱橫而斷續很土石裂暗  
竇谷虛鳴鳥上下伏獸號呼俯江流之蕩潏招列山之  
盤紆林巒作態而蔽虧于風雲效技而卷舒固可以開  
闔陰陽於一氣賓餞日月於天衢爰有窮人瞿然無歸  
曠四海無所投其足兮古帝命我於山之隈庇蓬茅之  
數椽于撫捫腹而常飢時醉飽而自得于亦杖屨而遨

嬉逾山而東席門草藩爰有君子於茲考槃自種自食  
鄰里莫干圖書滿家兒稚飢寒相見輒喜有時不冠寄  
萬事於一笑兮不知食糲而衣單吾不加物以一毫兮  
亦莫愛人之燠寒悟紛華之多虞兮幸寂寞之至安飲  
我薄酒歡有餘啜我豆羹甘而腴隱几而休讀我書乃  
曳杖歌曰升柯之巔明遠眺兮築柯之崦可以老兮終  
古不忒天之道予于于而行無喪吾寶兮

八公山賦

梁

吳均

峻極之山蓄聖表僊南參差而望越北灑迤而懷燕爾  
其盤桓基固含陽藏霧絕壁嶮巖層巖迴互挂皎月而  
常團雲望空而自布袖以華閭帶以潛淮文星亂石藻  
日流階若夫神基巨鎮而卓犖荆河箕風畢雨育嶺生  
莪高岑直于蔽景修坂出兮架天以迎雲而就日若從  
漢而迴山露泣葉而原淨花照磯而岫鮮促嶂萬尋平  
崖億絕上被紫而煙生傍帶花而來雪維英王子好僊  
會八公兮小山駕飛龍于翩翩高馳翔兮冲天



八公山賦

王永頤

繫八公之勝峙兮儼嵩萃以春容壓后土以踞虎子軼  
青霄而騰龍閱神明之嘉址兮實造化之所鍾巖岫紛  
其羅列子若孫拱而子恭控吳楚之形勝子矯齊秦以  
長雄挽淝河之縈帶兮瞰泗水之流東惟登臨以銷憂  
兮極瞻眺乎穹窿明艷艷以旁射兮神揚揚而上冲眇  
八極之非遐子緬九重之可通簸萬籟之砢砢兮遠羣  
囂之噦喁酣笙鐘於瀕洞兮駕彩虹於朗融履蘄巖而

捫蘿兮忘攀陟之為慵攬景光之萬狀兮撐空青之芙蓉今鸞翔以鳳翥兮忽奔馬而驚鴻猿猴竄而爭嘯子晴濤撼乎長松鳥啾鳴而不息兮佳木鬱其龍蔥遂班荆以少憩兮引壺觴而對客般嘯詠之悠揚兮風雲怪其動色撫廉頗之瑩兆兮訪春申之臺跡弔仁瞻之忠魂兮望召南之故宅昔苻堅之南征兮欲卷江以為席擁熊羆之號闕兮竟臨流以相逼是人事之不周兮抑天時之有逆何茲山之顯靈兮化草木為戈戟匪風鶴

之徒怪予乃耳目之為慝哂苻氏之披猖兮成晉玄之  
茂績余懷古而感慨兮發再三乎太息羌哀樂之紛集  
兮氣交橫於胃臆仍為客使更酌兮杯盤爛其狼籍煙  
霏霏以翠橫兮景翳翳以將夕既畢覽而下山兮猶返  
觀乎蒼壁爰作賦以自諒兮繼前修於無斁

遊朱方賦

元  
朱德潤

丁亥之冬僑寓朱方客有談江山之勝約余重遊焉於  
是攜酒肴搵衣躡屩縱步山城之下殘雪既消寒煙弄

晴長江浩瀚海門東傾西連建業北眺廣陵碧樹參差  
嵐光相縈浮玉峙於中流焦阜屹其稜層甘露構而多  
景扁華陽逸而塵鶴銘山橫北固水潔中泠西津喧于  
歸渡晚瓜步隔芳風帆輕汨雲濤之千頃實可壯遊觀  
而濯襟纓客曰子方登高而望遠蕩瀟灑之心曾獨不  
知南徐之舊鎮歷六代而提封晉宋則表其天限齊陳  
則矜其地雄梁則金甌無缺吳則鐵甕城空郡實浙西  
之障山為江左之衝近有虎跑之泉遠有鷓鴣之峯京

峴高兮龍目並曲河下而練湖漉黃鵠旋西白兔馳東

杜鵑開而鶴林仙去狼石卧而謀臣算同崇丘昇于五

州見卯港埭于千艘通碧瓦鱗次朱樓翠重且陽則阡

陌之饒其陰則巖巖之叢包吳越而帶楚尾引淮泗而

疏汴中茲豈非京口之壯觀而為南郡之所崇哉余謂

客曰子既已悉茲境之盛曾未厭於吾心蓋山川非人

不勝望郡惟前賢之登臨余既與子觀江流而知海納

盍亦思往古而評來今昔也江表為鎮為牧轉運節度

刺史都督世代旋移幾千萬人之相躅晉則謝玄桓冲  
唐則韓滉德裕旌旄擁於江皋貌貅夾於津渡辨士謀  
臣歌姬舞女蝸觸蜂衙蠅攢蟻聚莫不樂其功賞夸榮  
前度偉言論於青史騁英豪於茲土矣觀其踴躍功名  
際遇風雲凌厲山川指麾民人恍千古如一日追陳迹  
而無存慨江流之如昨情百感而難陳吾方與子攬江  
山之勝槩瀕漁樵之洲島渺天地之一身若驚塵之棲  
草嗟既往之難留思無窮之奚了於是挹林風而振長

袂坐盤石而飲清流知天命之已定與造物而同遊任  
去來之自得復皇皇兮何求

壯觀賦

宋

米芾

米元章登北山之宇徘徊四顧慨然而歎曰壯哉江山  
之觀也開闢曩古逝哉邈矣帝德所被北幽南趾王功  
未宣六合阻異明翳視其消長來版從而間起去古無  
章水濱莫委此世可悼晉裂漢髦披榛剔莽且代且盜  
豈地具而天設時資猶而附暴者乎乃物偶然而人乘

以智巧耳若夫真符秉中萬派朝宗稽顙納質不黷兵  
鋒版圖入而地合氛祲煦其天同遠琛近賈千里不風  
鑑湛一色折葦可通其或弱吹砌鱗疾疾湧山九地出  
沒千峰上攢如嶺並亘連雲俱還長鯨齒巨天吳腹斑  
閨運未至生民道艱宜乎曹郎託辭以按甲怫鬱而永  
歎也吾每登是宇覽是土當日杲天清嵐開練布邀太  
平君子引吳醇舞越女破千歲之長憂擲森然之萬古  
有祀初登田儀載旅至甚醉而乃去



金山賦

明

鄭宗舜

金山峩峩立彼江波其天造而地設抑神鑿而鬼磨煙  
雲子繚繞星辰兮布羅日月懸於楹牖蛟龍遊於檻阿  
壯哉竒矣嘒夫長江萬里順流而東溟溟澇澇淼淼涓  
涓吼狻猊馳風駿拔坤軸轉乾杠轟轟雷逐赫赫龍從  
斷瞿塘之峽劈五老之峰固瞬息而千里若囊綻而矢  
衝由之濤珠濺而柱折飛沫灑而磯崩順騰牛渚直指  
吳淞滄瀛既邇合派愈衆斯正赴壑之勢窮冠之鋒將

避之而恐及敢獨立以當衝茲山則亭亭間闕突自中  
起立靜專壓波靡鄰援不資聲色不侈縱震撼之不驚  
亦中立而不倚遏長驅於破竹衝堅陣於兩臂斯不戰  
而屈人兮亦匹夫而秉志猶之倒孟津之戈于潰昆陽  
之騎取日於虞淵兮存孤於晉紀櫻孤城於睢陽走老  
瞞於赤壁誠文王之怒仁者之勇矣及循波羅之岸躡  
至信之磯觀瀾聽潮廊步不迷乘風帶月葛巾杖藜閣  
則朝陽江天樓則海嶽涵虛眺煙雨之奇觀覽雙塔之

遺墟穿寂境折盤陀出藤蘿之外境登一覽之危坡蹲  
踏妙高之臺惕息冰雪之窩浮金湧翠嘉名不磨養素  
鎮濤於焉再過大觀於海雲之亭重寄酬於郭璞胡日  
中之不遁尤詭祕於江峩既生死之有數將陵谷之謂  
何考三禁之竒跡尋危巖之裴公出雪洲穿妙空橋度  
惺惺池瞰蒼龍覩如來之面立般若之峰斯皆深瞰龍  
宮高凌象度行者歛噓立者恐怖及登陟懸巖乃回頭  
於一步細炊竹葉旋汲中泠將試蒙山之上品驗陸羽

之茶經動清風於兩腋覺沉痾之頓輕潤通法雨功邁  
洗心撫轆轤則法輪常轉瞰深清則修綆宜尋斯第一  
之稱萬世之名比厨異香積堂開大徹弘濟功深饑饒  
道塞媿稷道之陵夷思博施而未得聿茲臺殿突兀巖  
從或嵌懸壁或倚危峯或倒臨龍窟或上摩高空如翬  
斯飛如苞之叢鱗鱗角角隱隱隆隆細細溫溫杳杳濛  
濛竹牕搖日松榻流風丹霞護於懸磬顛負負其晨鐘  
篆香凝而晝暝舍利見而宵明蛟龍驚輪藏撒綵雲流

旖幢揭貝葉動異香洩疑三島之瑤宮與大千之樂國  
因而眺長江觀巨浪望海門瞻疊嶂時乎清風息朗月  
上綠煙乍消金波不漾澄萬頃之玻璃連長天於一象  
浮光湛然靜影晃晃恍若步金磚於琪園壓銀盤以青  
嶂吳帆楚纜蘭橈竹榜欸乃輕歌呶啞緩繫來若中留  
去疑不往或緩而似馳或迅而復蕩時乎風雨合蛟龍  
爭陰霾起濁浪層馮夷舞海若騰長年泣舟人憐張皇  
頃刻失措顛連使人神馳魄悸毛髮竦然若東海紅羲

輪駕六合白瓊花下悉順時而改觀皆可喜而可駭觀  
太平於有象開無聲之圖畫比夫暮鐘動晚潮升征騎  
獵獵戰鼓鈺鈺嗟有期而不爽悟人事之虛盈若或指  
戰場於北固望王氣於金陵蔥蔥蓊蓊渺渺冥冥覩蛟  
盤而螭據思虎鬪而龍爭幸金湯之如故懷保障之無  
能亦或仰長空飛鳥疾俯深淵遊鱗集臨磯呼老龜出  
斯至信之所孚非一朝而一夕殆有甚聽法之較點頭  
之石斯皆異態交從竒觀雜首類有德之潤身而文章

之外飾者也。弔維往古靈異彌牖啟水陸之玄宗拔九  
幽之墮苦或胎幻以知期或書經而病脫雖在怪誕而  
無徵又相傳而不惑斯又類神化之無方而非常情之  
所能度用是名賢聞士罔不假步迴車或以為遊仙之  
傳舍或指為丈客之寰區用能解坡翁之玉帶發張子  
之秀句斯有似夫德高而利見實修而盛譽者矣然是  
豈直遊燕之地釋子棲息之居而已邪亂曰天高地厚  
予造化實工陽闢陰闔予變化無窮高高下下兮莫測

其蹤或山立於淵子泉瀑於峰知無物不有子可興可  
風惟達人大觀兮近取吾躬秉節貴定兮處世慎從修  
德乃耀兮尚絅於中寧蒙求我子匪我從童萬說不移  
兮虛受而通始終一致子德乃尊崇貧富不渝子夷險  
則同首陽奚貴子千古高風我心匪石子變化猶龍蒸  
雲布雨兮靜乃有功將泰三而中立子焉事夫培塿之  
蟻封言有盡而意無窮乃返擢而擊節於江中

金山賦

□ 盛 恩



潤有金山公子與焦山處士相遇於大江之東公子嬉  
嬉然有怡色詡詡然有誇容迺語諸處士曰潤自古昔  
郡名未方控引全吳凌躡大江金焦並峙東西相望膾  
炙多口震蕩遐荒若有奚異與台並颺請各撰媿用質  
低昂夫金山者據京口之上游界南北之中央屹橫流  
之砥柱亘帝都之巨防雄跨肇於太一嘉名錫於李唐  
星紀牽牛熒熒煜煜而垂耀焉勢迎長江漉漉泔泔而  
會交焉其東則吞吐溟渤枕倚扶桑玉山為肱爾質我

相雲山作股曲阜連岡石堰儼戶樞之闔闢正屏羅物

色之弛張爾焦峰以列障彼北固以為隅含谿懷谷而

獻巧浣沙抱石而呈竒咸頰躬而下首可使氣而指頤

和風浩蕩拂其隈初月滉瀟射其阿延暘谷之朝旭道

尾間之夕波爾其宮室則基以重淵垣以積石苔以鱗

刺甃以雲覆高門有闕修廊旋復玄墀碾碾而流霞皓

砌琳珉而瑩玉大雄殿其中海雲堂其側焦光祠其右

善財閣其北吸江亭其巔水晶宮其麓寶蓮擢穎於海

峰朝陽蘸光於寶墨一漚浮於佳處壯觀得於望江飛  
仙鍊丹而妙福千佛贊善於東菴於是乎秋蘭菅莎歲  
蒨芷蔥薇蕨江蘼荔光載菁枸杞春華荼菊夏榮彌岡  
被皋而蓊鬱蔓崖紫壁而敷英王芻苜臺戎葵懷羊青  
菁射干揭車苞黃香藹藹而遐襲色芊芊而孔陽於是  
乎蒼松翠柏杉檜梓桐樅栝梭楠赤檉丹楓大榆合抱  
修竦雲叢挺幹垂條於谿谷繁陰布葉於岑峰鳳尾慈  
孝篔簹射筒筍筍抽節綠葉翠莖傲霜競秀凌雪逾青

鸞鷲食其實鸛鷺巢其中於是乎鷓鴣秋棲鵲鳴春鳴  
睢鳩麗黃關關嚶嚶鷓鴣鴛鴦鴻鶻理翮整翰於  
其末浴波啄藻於其溟玄鶴白鷺黃鵠青晨於是乎瓊  
桃早實琪草先華竒葩眩錦雜卉流霞葛覃莫莫而蔓  
衍灌木萋萋而交加麗黃求友於蒼蔚之岑玄鳥掠雲  
於瀉瀑之涯其西則遐矚岷峨邈挹荆楚匯以潯陽阻  
以瓜步金陵道其脈五州袒其肩下鼻漱其液江流突  
其巔龍潭峙而嶮巖直州衍而平原江流湯湯直瀉萬

里怒濤雷奔驚湍電起大火墜於虞淵夕暉淪於濛汜  
於是乎秋聲浙澀白露載零井梧凋翠崖菊敷英鴈陣  
驚寒於遠浦芙蓉倒景於滄溟木蘭侵桂梭杼把櫛爰  
擢修幹載竦長條鵬鷲高騫乎雲漢猿狖長嘯乎林皋  
其南則百粵所屆四閩所通兩浙紆其臂三吳盪其胃  
長揖會稽於逖域頰糾疊阜於邇封搏鵬星翥警鶴雲  
翔菊峰挺秀峴嶺峇堯寶蓋亭亭乎豐部磨并翼翼乎  
清標漕渠習坎津驛通衢舳艫鱗次冠蓋塵驅客子肩

揮而競渡舟人楫詬以爭艤於是乎薰風薦爽水殿生  
涼嘉木繁陰鬱鬱蒼蒼虎兕風於冰雪之窩蛟龍沃於  
迴瀾之房芰荷揚頰葵榴熾葩岸幘凜而增寒絺綌紛  
而忘燠其北則燕冀在望齊魯指掌徐泗孔邇淮揚接  
壤黃河紆帶而橫奔呂梁截孽而流響挹具區之大數  
鬱益益之無底爰自泰而徂通行鹽田之千里揚子之  
梁通具亢太一之峰委具體穹然秋虹之麗空邈爾蟻  
封之突起爪渚作鎮天塹要津囂囂熒熒實我比鄰於

是乎朔風淒淒玄雲漠漠雨雪霏霏石出水落綺閣重  
闈煖歌燠酌雪藕冰桃互為酬酢鬱鬱盤徂徠之松猗  
猗撼崑崙之竹灑鶴啄寒瀨之冰梅花露先天之易娛  
爾歲時瞻望北極爾其體勢則鳥道陟其巔龍宮守其  
基滄浪流而為隍兩岸廓而為隅颶風無纖埃之集潦  
雨眇微津之淤伏牛彷彿浮玉依稀獲符互父名與世  
移爾其勝概則金鼇中屹妙高插空善財頭陀怪石籠  
從崆峒噶喝石脾之山塘此岵岵裴公之巖璞墳瀆薄

而隱跡中冷涌清而寒泉爾其梵宇則大雄西敞輝煌  
金碧天王伽藍前驅後翼江天乘聽潮之軒海嶽載毘  
盧之宅雄跨玉鑑天徹悟心三禁永安養素涵清雪月  
無邊煙雨化成留雲北偃吞海西憑廊腰紆折而蜿蜒  
簷牙高啄而崢嶸若乃日霽天晴風和雲斂珠履尋芳  
士女遊行挈榼提壺登高望遠鏤壁鐫崖剝苔沅鮮估  
客艤八方之舟三老忽龍門之險櫓聲伊軋於中流漁  
唱悠揚於清淺揭寰宇之奇觀余耽樂而忘倦若乃陰



風號怒浪起蜃擁波龍撼雨閭若天昏蹴若地圯神蛟  
鼓鬣而噴怒江豚延頸而怵舞舟子狂呼傾檣毀櫓余  
亦悄然而悲肅然而怖若乃貴介公子墨客騷人探竒  
覽勝輝映古今感真宗之夢寐動文帝之哦唸英廟異  
申而晉錫武皇駐蹕而來臨宋學士之解帶唐宰相之  
命輪金玉充棟珠貝盈垣歐蘇沂其流孫張啟其端煥  
爾詞林爛然文苑托茲山而並久終萬古而弗諼若乃  
明神降靈高僧棲跡裴陀能構佛印善葺菑畬薦千頃

之租水陸賚萬方之福豈若野人之蹶躄宴子之齷齪  
公子辭畢渙澣欠伸切齒怒目奮臂攘襟諒處士之見  
屈敢怙勢而凌人

焦山賦

□ 盛 恩

焦山處士於是色若不敢怒口若不能言羞與之爭將  
命履而還公子固止之前掣後曳強而後可乃相與班  
荆踏石從容而為之說曰道在反始士貴知方駁已者  
絀軋人者亡被絺繡者難與道疏布之麗密醉醇酎者

豈復知玄醴之芬芳噐噐煩穢潰德之坊瑰竒麗靡戕  
性之良夏蟲之疑冰者篤於時也鷦鷯之自足者局於  
分也吾子其未覩無方之大道焦山之巨麗乎且焦山  
之肇基也資始於希夷流形於混沌蓋造化之所私實  
靈鈞之所重奠朱方之東域屹崔嵬於汪洋體坤維之  
妙質萃水府之精英飲江海之靈液吸日月之休光不  
銜竒以賈名不近譁而招累恒守約而不矜惟因循而  
簡易任自然以為華無誘慕於世偽若度長而絜短豈

金山之可類辨方定位則或跨其左或伏其右而尊卑  
定矣角形比體則或廓而豐或藐而确而小大形矣雜  
物撰德則或動而華或靜而質而本末殊矣正名熙號  
則或命之唐或錫之漢而後先別矣爾其體勢則東延  
瀚海西道長江南抱徐陵北倚維揚體高鬱而幽爽紛  
郁郁其難詳金山塞其外戶北固植之傍垣汝峰象阜  
偃突連延京峴東雩疊嶂重巒絕巘增石簡積砢砭兀  
巉犖巒傾側倚伏或倒景於重溟或矗峯於空碧遐睨

蓬壺俯瞰沃焦洲渚肆衍漫漫漉漉摩窈巧老港洞卑  
高坑谷坎窞覆安淳滲納夕景於杳榆晞晨光於陽皋  
爾其山勢則盤紆隱深糾紛岑巖玄渚翠嶺岵峿嶮  
丹崖嶮巖青壁萬尋貌崑山之高嶽劣扶疎之鄧林重  
巖增起連蹇雲覆隆崇極壯巍岵秀特上干霄漢亭亭  
翼翼將躋巔而未半忽懼怵而駭惻非伏波之矍鑠孰  
究升而竟陟消散氛埃澄集清澍雨師所駕風伯所憑  
瞰宛虹之長鬣蒸靈液而出雲爾其江流則發源岷山

導流巴梁泓量海運滔洩淼茫溟溟瀟瀟稽天而白盤

渦谷轉凌濤山仄罔象暫曉而閃爍天吳乍見而髣髴

顛波奔突狂赴爭流觸崖舐隈鬱怒彪休澌汨澎湃蚤

蟪相糾碧沙潰泄而來往巨石砢砢而却留呼吸萬里

瀆薄相陶協靈通氣吐納汐潮環四隅而為廓望孤嶼

而作標爾其勝槩則海門松寥兩山分峙禮斗燒丹兩

壇並據盤礴山巔嶺曰焦仙西南半麓三詔洞懸幽澗

積岨而巖確修罔峽堞而編壘觀音羅漢座鶴釣魚各

以巖名獻怪呈竒石屏浮玉棧道礫礫觝角鑽丹諸石  
錯置足音罕屈而岑寂間介無蹊而可躋惟霹靂之靈  
塊倚義之之名迹偃青玉之曲塢俯碧玉濤之幽鷗朝發  
河渚夕宿江渚浮沈往來乎四側雲集霧散乎高枝於  
是乎猿父哀唸獐子長嘯梟羊麕狼青兕玄豹或失氣  
而恐吼或挐攫而駭跳狝鼯之羣於菟之屬獐然之黨  
羶踰之族騰蹕飛超於邃林沸亂暈散於僻谷於是乎  
白儵頰魴青鯁翠鱗銀鱗夏泳刀鯨春生江豚吼浪鷄

鷗避風汨汨沒沒沈沈溶溶鹿駘象鼻虎鬚龍鬚六眸  
之龜三足之鼈揚鬚擁波掉尾噴雪曝采嚇鯢於其巖  
汎激混淪於其穴於是乎鉅生鴻儒文吏翰卿揚帆直  
擣鼓柁來臨或嬉而遊或聚而唵或飲於阿或濯於濱  
命楮揮翰鐫石紀文華壁高標乎秀句修篇錯落乎高  
甍斷碑沉於芳瀨古篆蝕於苔紋於是乎遯世之士避  
人之流榮啓之侶綺季之儔長棲邃穴靜偃竇幽藐綸  
綍之三詔傲軒冕而悠悠僧人釋子蟬蛻鴻冥跨飛梁



而小構臨清渚而浮生說法而閨風發入定而巖穴暝  
龍延耳而夜聽鶴輕馭而晨征於是乎淵客築室鮫人  
構宮蘆子乘槎漁父汎舡存殿為泠羅筌灑筒投網逐  
波迴輪趁風垂餌出入而連白鳴榔厲響而殲紅褫叔  
鮪於驚湍曳玉鱣於巨漑貫鯢罾尾而嬉語掣三牽兩  
而驩容於是乎萑葦被渚蓼蘋拂涯蘆筍菁道鬱鬱離  
離潦水盡而是刈春旭晞而采之林無不綉岸無不津  
耕新畝之沃壤播黍稷之綦綦負耒引犢荷鋤耒雲飯

香杭而自足豈逐巧而求人若其幽遐闕邃間曠魄突  
耳目之所不逮足跡之所難入勝不可窮之於言妙不  
可殫之於筆茲略舉其梗槩以復吾子之見屈也

北固山賦

盛恩

公子之與處士辨囿既闢辭鋒迺厲各相誇詡倦而就  
憩北固山主人於是揖而進曰二君之談樂乎蒙之竊  
聽久矣嘗聞齊楚競利而漢得以信其威吳蜀爭長而  
魏得以成其功敢申小子之末議以廁大人之高風公

子固云失矣處士其亦未為得乎夫太極肇判陰降陽  
升游氣紛擾有萬不同凝而為山峙流而為川融長江  
大河天限南北非以相感也喬嶽疊阜界畫邦圻非以  
相欺也辨方正位者以中土為尊體國經野者以夷曠  
為德今公子列為西藩而佻天以乘人處士命之東土  
而露才以敷已皆不可以垂訓作則而適足以貽譏致  
辟也金焦之事又焉足道獨不聞北固之名山乎吾將  
語二子以主客之勢偏正之區江城之要會澤國之樞

機邃古之初上帝命都錫之潤土以界楚吳塹以長江

亘以喬嶽誰其尸之實維天作西峙金山東偃焦峰左

紆吾臂右引吾肱巍然北固雄跨在中水陸之所輻輳

四方之所具瞻陰陽之所委順風雨之所周旋日月之

所毓秀雲霧之所蒸液珍怪之所化產瑰竒之所窟宅

金精瑱其裏玉英琤其表驪蚌摻其趾梢雲冠其嶮據

坤靈之寶勢承蒼昊之殷純萃五德之變化含元氣之

烟煨玄醴涌騰於其麓甘露被宇而屢臻南臨鐵甕之

郭北倚揚子之江西控龍蟠虎踞之都東引海門天蕩  
之鄉且具郡治直延鬻宮傍翼神祠梵宇左起右伏關  
梁隆跨塵市絡繹河隍委蛇閘堰交植城堞百雉而連  
雲煙火萬井而在目者則星羅於其前也其沖融沆瀣  
渺瀰淡漫波如連山乍合乍散洩湫澱豔浮天無畔濤  
吼成雷湍感為林崩雲屑雨詭色殊音舟人漁子徂險  
極深汨沒於鼉鼉之窟挂罽於嶠嶠之岑者則帶紆於  
其後也其崇島巨壑崕峴孤峰俯劈洪波仰指太清柳

溪鰻井汨汨泠泠秋月之潭纖塵不凝鳳凰之池九苞  
英英曲徑幽崖海嶽爭勝樓挹多景巘藏五聖走馬澗  
泓海涵河映偃孫吳之狼石紀梁武之別名則古今勝  
迹往往而在其朱闕穹窿梵宮高聳負陰抱陽前翼後  
擁高閣齊雲百級懸磴諺門曲榭邪阻原洫修廊廣廡  
頡連城堞彤雲斐亶以翼擡皦日炯晃而耀室則勝院  
名菴不可殫述其稜稜劒氣款款鋒威弧矢聲轟驚塵  
橫飛北牡驪黃騰連風逸旌旗蔽野閃雲爍日鉦鼓發

而聞雷凱歌旋而震谷則演武之場闢於其趾者也其  
銅鏞鐵鑊鮮蝕苔侵容優百斛重踰千鈞浮圖鎔冶挂  
日撐雲方竹之杖泥蠟之金古鐵擊之而清越斷碑疊  
之而嶮崟則瑰竒名物藏於其中者也其靈草冬秀神  
木叢榮巖峻峭崿金石崢嶸珊瑚碧樹周阿而生布萋  
萋之織卉挺落落之長松蔓樛木之修羅延萑藟之飛  
莖朱桂黝條於南北紫芝阿那於西東揆楠蕙芷鬱鬱  
翁翁則林麓之饒於何不有其長楊映沼芳枳編籬植

以拒柳坊以金隄梅杏郁棣蔥韭薑芋朱櫻碧蓼動薺  
萊蕪諸葛之菜張公之梨周文之棗房陵之李磊落繁  
英於其林負霜含露於其畦則園圃之毓寶繁有叢其  
猿雌晝吟鼯鼠夜叫寒熊振頷特麇昏彭山禽晨鳴野  
雉朝雓虎豹豺兕鷓鴣鷹鷂飛揚躍竄而邁馳翩翻駢  
駢而駭跳則毛羽之羣草伏而木棲也其魴鯉魚鰕海  
若鯨魚玄牛紫貝水豹者龜叔鮪王鱸江豚海豨交躍  
縱橫振鱗奮翼洩洩淫淫駭神奪目中流漬薄而閃屍



滄瀨蹉跎而失足則鱗介之族晨游而夕泳也其皇輿  
帝蹕霸主道君卿相之輻刺史之輪翰苑詞林之玉趾  
幽人空谷之足音旅子瑣尾而落魄估客失歧而問津  
則延頸繼踵其從如雲其宸翰綸音雄文妙墨雜煥斗  
星錯置金玉或榜之楮或鏤之石秀章熠爚於碧丹鳥  
篆蚪蟠於朱綠則雨蝕塵蒙不可盡識若乃冬不淒寒  
夏無輝炎均調中適四序便便法鼓琅以振響晨香馥  
以揚煙琴高之所靈橋王喬之所留連釋子盤石而誦

法方士餐術以延年丈人抱甕而灌畦農父負壠以耕  
田蒙草塞谿人跡罕至風月無邊丹青失技望之者過  
臨至止者忘去言有大而非誇事足徵而可據豈若孟  
浪之遊談無當之虛譽也主人之言未卒金焦二客乃  
矍然相顧睨焉失色再拜致恭同聲而謝曰聞韶獲者  
然後知鄭衛之淫汙覩無窮者然後悟井天之咫尺僕  
黨疎狂進退維谷而今而後庶幾有識主人亦莞爾而  
笑油然以懌乃相與啜中冷之茗酌甘露之醴飯新畬

之禾烹長江之鯉歡然相得擊壤而各為之歌公子歌  
曰望帝都兮歲蕤屹中流子巍巍駕金鼇子駸駸鎮朱  
方子無隕處士歌曰吸滄溟子湯湯聳具瞻兮東方棲  
高士兮焦光名萬古兮洋洋主人歌曰江浩浩子山峩  
峩聳朔域子潤之阿振鴻濛子撼鯨波

洞庭兩山賦

有序

明  
王  
鏊

楚之湖曰洞庭吳之山亦曰洞庭其以相埒邪將地脈  
有相通者邪郭景純曰包山洞庭巴陵地道潛通傍達

是未可知也而吾洞庭實兼湖山之勝始山特為幽人  
韻士之所棲靈仙佛子之所宅至國朝名臣徽爵往往  
出焉蓋湖山之秀磅礴鬱積至是而後泄於人邪東岡  
子曰山川之秀實生人才人才之出益顯山川顯之維  
何蓋莫過於文兩山者秘於古而顯於今其實有待子  
無用辭余曰然乃為之賦其辭曰

吳越之墟有巨浸焉三萬六千頃浩浩湯湯如蒼溟渤  
澥之茫洋中有山焉七十有二渺渺忽忽如蓬壺方丈

之髣髴日月之所升沉魚龍之所變化百川攸歸三州  
為界所謂吞雲夢八九於胸中曾不帶芥者也客曰試  
為我賦之夫太始沕穆一氣推遷融而為湖結而為山  
爰有羣峰散見疊出於波濤之間或現或隱或浮或沉  
或吐或吞或如人立或如鳥騫或如龜鼉之曝或如虎  
豹之蹲忽起二峯東西雄據有若巨君彈壓臣庶又若  
大軍之出千乘萬騎旌幢葆蓋繚繞奔赴東山起自莫  
釐或騰或倚若飛雲旋颺不知幾千百折至長圻蜿蜒

而西逝西山起自縹緲或起或伏若驚鴻翥鳳不知幾  
千萬落至渡渚迴翔而北折試嘗與子登高騁望近則  
重岡複嶺喊呀虜豁紫洲枉渚蚩螿緬邈遠則煙蕪渺  
瀰天水一碧帆影見而忽無飛鳥出而復沒靈巖則返  
照孤稜弁山則輕煙一抹此亦天下之至竒也若乃長  
風駕浪歛山欲野足使人魂驚而汗駭及其風日晴熙  
穀紋連漪又使人心曠而神怡至於瑤海上月流光萬  
頃星河倒懸蕩漾山影又一竒也遙山霽雪凝華萬疊

玉鑑冰壺上下相合又一竒也風雨晦明頃刻異候煙  
雲變滅咫尺殊狀雖有至巧莫能為像試嘗與子弔古  
尋幽則有迴巖穹壑竅窳相通琳宮梵宇暮鼓晨鐘壽  
藤靈藥美箭長松金庭玉柱石函寶書靈威夫人之所  
闕也貝闕珠宮繡縠鳴璫柳毅書生之所媿也翠峰杜  
圻范蠡之所止息黃村角頭綺皓之所從逝也而闔閭  
夫差之跡尤多存者玩月之渚消暑之灣牧馬之城圈  
虎之山練兵之瀆射鶚之巖出金鐸於淺瀨逸梅梁於

驚湍他若毛公燒丹之井蔡經鍊藥之塚聖姑絕雉之  
塘雪竇降龍之淵其石則岌業嶙峋瘦漏嵌空牛竒章  
有甲乙之品宋艮嶽有永固之封其泉則困淪臧沸甘  
寒澄碧墨佐君表無礙之名天衣禪留悟道之跡斯地  
也孫尚書欲卜居而未能范文穆思再至而不果豈如  
吾人生長斯土依巖架棟占野分圃散為村墟湊為闌  
闌桑麻交蔭雞犬鳴吠里無郭解劇孟之俠市無桑間  
濮上之音婚姻相通若朱陳之族理亂不識若武陵之



源佛狸之馬跡不到周顥之俗駕自旋星應五車地絕

三斑盧橘夏熟楊梅日殷園收銀杏家種黃柑梅多庾

嶺梨美張谷雨前茅茗螯餘萌竹水族則時裏之白鱸

殘之銀魴鱸鮒鮓自昔所珍吾且與子摘山之毳掇野

之茸割湖之鮮釀湖之醲汎白少傅月夜管絃之舟和

天隨子太古滄浪之歌弔吳王之離宮扣隔凡之靈窩

凌三萬頃之瓊瑤覽七十二之嵯峨其亦足樂乎彼岳

陽彭蠡非不廣且大也而乏巍峩之氣天台武夷非不

高且麗也而無浩渺之容蓋物不兩大美有獨鍾茲謂  
人間之福地物外之靈峰是固極遊觀之美而未知造  
化之工且夫天地之間東南為下非是湖為之尾閭洩  
之瀦之則汎濫橫溢江左之民其為魚乎懷襄之世湖  
波震盪非是山為之砥柱鎮之繞之則奔激暴嚙湖東  
之地其為沼乎唯夫天作之寬以納以容地設之險以  
襟以帶禹順其流分疏別派三江既入萬類允賴而後  
吾人乃得優游於此蓋至是而後知造化之意深神禹

之功大評曰吾何歸乎吾將歸乎湖上之青山世與我  
而相遺超獨邁其逾遠海山堯率不可以驟到非茲峰  
之洵美子吾誰與寄此高蹇

槃谷賦

明

王 鏊

夫何太湖之淼茫兮峙雙玉於西東蔚澱紫之巉巖兮  
峰巒抱而中空渡渚汪洋而交貫子仍島嶼之無窮稻  
畦鱗次以擲比子美西崦之寬宏亭臺儼其高下子間  
巷互而相通嗟夫人之好修子乃行義於其中握瑾瑜

而不耀子甘自混於凡傭朝出耕而暮讀子澹浮名之  
夕空非夫人之獨善子慨斯世之不庸不吾庸其亦已  
兮信橫目之為恫仰觀山之峩峩兮俯翫水之溶溶俯  
仰山水中以自得子將有言子是從將無言兮是從

虎丘山賦

有序

明

梁寅

孫茂才其淵歸自吳郡詫虎丘之勝代雖屢易而境乃  
不殊因求賦之余昔嘗東遊登眺靡及歎遐想之徒勤  
媿賞音之猶缺處幽慕竒遂為之賦於其淵之再往也

書以遺焉其辭曰

雄矣哉逶迤蜿蜒句吳之都東臨乎滄溟赤城西瞻乎  
富春桐廬虎丘之山耽耽渠渠千層雲之掩靄瞰澄流  
之縈紆伊昔壽夢四傳英君奮烈威摧強楚勇讐於越  
宮車既晏崇陵截薛於是閼竈洞深珍玩厚藏精金之  
氣夜發竒光化為號獸彪炳呀張茲虎丘之所以得名  
增氣勢乎高岡故陟而望之危闈翬起飛觀鵬騫魚鱗  
萬室蜃彩百廛人行肩摩商萃衽連騎若電燿車若雷

闡踰齊軼秦跨趙陵燕俯茲山之下則煌煌金地峩峩  
梵宇度清飈於松關騰香靄於蘭路龍游方石之池鶴  
鳴珠英之樹猿蹲聽經之巖鹿翔散花之天亦有搽竒  
雅士探幽逸人逍遙寒澗跣躄夕曛詠頽霞於初霽候  
素月於將昏乃步石逕乃睨層臺寂寂歌舞萋萋蒿萊  
日淪而復東生波逝而無西迴古轍迹久夷荒墳日已  
頽義聞恆不泯雄心乃終摧嗟孤忠之伍員凜生氣而  
猶存馳逸興而曷已信遺蹤之未湮

虎丘看月賦

明

黃尊素

武林有客吳者適逢八月之望吳公子邀之操單舸遊  
虎丘蓋吳俗翫月大抵集此也至則綺羅竿交笙歌鼎  
沸月懸扶桑煙浮水際巨舩小艇縱橫若鷗鳧之集於  
是攜餽飭尊葦靡辟荔以為席有少年持檀板坐生公  
石起子夜之吳歌振激楚之餘風出潛魚於水底落山  
鳥於青松善洞簫者倚歌而和之吹幼眇激壯音嫋嫋  
餘響聞者沾襟興盡而返水滢公子曰今日之遊樂乎

客曰是何足樂也公子曰子豈以蘇臺空西施去夜月  
隨煙浪以滔滔故墟餘靡蕪以離離哉客亦覩夫勝趣  
乎蓋聞覽勝者不逞巨麗以為觀也得趣者不撝竒地  
以為歡也其山不必龍從崔魏嶄巖紆鬱絕歸鴈於碣  
石接飛鳥於暘谷其水不必洶湧滂潏控清引濁天吳  
命儔而嘯侶鱷魚踞齒而四足其林不必棄夸父之策  
伏夔魑之怪擢本千尋垂條四蓋猿父哀吟其中治鳥  
焚巢其界客試略海島之巨觀現吾丘之餘態勃窣叢




薄之中逍遙雲岫之槩過林莽背嶽歛平疇衍漾孤峯  
逶迤周圍一里之內而名泉怪石古寺殘碑充牣其間  
雖窮搽而尚遺况復伯國之餘烈名姬之斷魂晉人之  
風流皆足以醒弔古之心脾試與子浮彩鷁挂錦帆振  
衣盤虎之巔濯足劒池之瀾指點夫差之自用再見士  
誠之偷安而層臺累榭跨谷彌山錦瑟歌鐘漏徹更殘  
都已付之斷腸芙蓉啼眼幽蘭事無新而不故人無感  
而不靈聽經聲於木杪掘藥草於寒汀山山明月處處

秋聲撫鶴歎息捫松傷情吾將邀孫登以長嘯命王子  
而吹笙斯時極人世之繁華五嶽之奇險未嘗與虎丘  
有逕庭也客顧以蟻垤蜂衙視之減虎丘之勝趣何睥  
睨吾姑蘇之甚乎

謹案卷二十一第二十二頁前二行朗月上刊本

朗訛浪今改





總校官庶吉士 臣張能照

校對官編修 臣馬啓泰

校對官編修 臣閔懋大

騰錄監生 臣姜也魯

騰錄監生 臣楊仁基